


0cm 1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27



浙江圖書館




浙江圖書館

唐荆川先生編纂左氏始末卷之十一

名臣

晏平仲

晏平仲嬰萊之夷維人桓子弱之子及事靈公莊公
景公初晉大夫欒盈得罪奔楚晉於是會諸侯於商
任以錮之莊公三年欒盈自楚來奔晏子曰商任之
會受命於晉今納欒氏將焉用之小所以事大信也
失信不立君其圖之弗聽退告陳文子曰君人執信
臣人執共忠信篤敬上下同之天之道也君自棄也
弗能久矣時欒盈猶在齊晏子曰禍將作矣晉將來



伐不可以不懼明年果有晉師五年崔杼慶封弒莊
公晏子枕公股而哭之崔杼立景公元年慶封與崔
杼有郤崔杼自殺三年田欒鮑高共攻慶封慶封出
奔景公四年吳季札來聘見晏子相得甚歡說其納
邑與政故晏子因陳桓子而納之九年公使晏子請
繼室於晉晉人許之既成昏晏子受禮叔向從之宴
相與語叔向曰齊其何如晏子曰此季世也吾弗知
齊其爲陳氏矣公棄其民而歸於陳氏齊舊四量豆
區釜鍾四升爲豆各自其四以登於釜釜十則鍾陳
氏三量皆登一焉鍾乃大矣以家量貸而以公量收

之山木如市弗加於山魚監蜃蛤弗加於海民參其
力二入於公而衣食其一公聚朽蠹而三老凍餒國
之諸市履賤踊貴民人痛疾而或噢咻之其愛之如
父母而歸之如流水欲無獲民將焉辟之箕伯直柄
虞遂伯戲其相胡公大姬已在齊矣初公欲更晏子
之宅曰子之宅近市湫隘踣塵不可以居諸更諸爽
塏者辭曰君之先臣容焉臣不足以嗣之於臣侈矣
且小人近市朝夕得所求小人之利也敢煩里旅公
笑曰子近市識貴賤乎對曰旣近之敢不識乎公曰
何貴何賤於是公方繁刑有鬻踊者故對曰踊貴履

賤既已告於君故與叔向語而稱之公以是省刑焉
及晏子在晉公更其宅反則成矣既拜乃毀之而爲
里室皆如其舊則使宅人反之且諺曰非宅是卜唯
鄰是卜二三子先卜鄰矣違卜不祥君子不犯非禮
小人不犯不祥古之制也吾敢違諸乎卒復其舊宅
公弗許因陳桓子以請乃許之十六年陳鮑攻欒高
氏二十六年公疥遂疢期而不瘳諸侯之賓問疾者
多在梁丘據與齋款言於公曰吾事鬼神豐於先君
有加矣今君疾病爲諸侯憂是祝史之罪也諸侯不
知其謂我不敬君盍誅於祝固史嚚以辭賓公說告

晏子晏子曰日宋之盟屈建問范會之德於趙武趙武曰夫子之家事治言於晉國竭情無私其祝史祭祀陳信不愧其家事無猜其祝史不祈建以語康王康王曰神人無怨宜其光輔五君以爲盟主也公曰據與款謂寡人能事鬼神故欲誅於祝史子穰是語何故對曰若有德之君內外不廢上下無怨動無違事其祝史薦信無愧心矣是以鬼神用饗國受其福祝史與焉其所以蕃祉老壽者爲信君使也其言忠信於鬼神其適遇淫君外內頗邪上下怨疾動作辟違從欲厭私高臺深地撞鍾舞女斬刈民力輸掠其

聚以成其違不恤後人暴虐淫從肆行非度無所顧
忌不思謗讟不憚鬼神神怒民痛無悛於心其祝史
薦信是言罪也其蓋失數美是矯誣也進退無辭則
虛以求媚是以鬼神不饗其國以禍之祝史與焉所
以天昏孤疾者爲暴君使也其言僭慢於鬼神公曰
然則若之何對曰不可爲也山之林木衡鹿守之澤
之萑蒲舟鮫守之藪之薪蒸虞候守之海之鹽蜃祈
望守之縣鄙之人入從其政偏介之關暴征其私承
嗣大夫疆易其賄布常無藝徵歛無度宮室日更淫
樂不違內寵之妾肆奪於市外寵之臣僭令於鄙私

欲養求不給則應民人苦病夫婦皆詛祝有益也詛
亦有損聊攝以東姑尤以西其人多矣雖則善祝豈
能勝億兆之詛君若欲誅於祝史修德而後可公說
使有司寬政毀關去禁薄斂已責公田於沛旣還晏
子侍於湓臺子猶馳而造焉公曰唯據與我和夫晏
子對曰據亦同也焉得爲和公曰和與同異乎對曰
異和如和羹焉水火醯醢鹽梅以烹肉魚燂之以薪
宰夫和之齊之以味濟其不及以洩其過君子食之
以平其心君臣亦然君所謂可而有否焉臣獻其否
以成其可君所謂否而有可焉臣獻其可以去其否

是以政平而民不干民無爭心故詩曰亦有和羹既
戒既平醜假無言時靡有爭先王之濟五味和五聲
也以平其心成其政也聲亦如味一氣二體三類四
物五聲六律七音八歌九風以相成也清濁大小短
長疾徐哀樂剛柔遲速高下出入周疏以相濟也君
子聽之以平其心心平德和故詩曰德音不瑕今據
不然君所謂可據亦曰可君所謂否據亦曰否若以
水濟水誰能食之若琴瑟之專一誰能聽之同之不
可也如是景公飲酒樂公曰古而無死其樂若何晏
子對曰古而無死則古之樂也君何得焉昔爽鳩氏

始居此地季前因之有逢伯陵因之蒲姑氏因之而
後大公因之古若無死爽鳩氏之樂非君所願也三
十有二年有彗見於國公念自傷晏子曰君高臺深
池賦歛如弗得刑罰恐弗勝第星將出彗星何懼乎
公曰禳之若何對曰無益也而祇取誣焉天道不諂
不貳其命若之何禳之且天之有彗以除穢也君無
穢德又何禳焉若德之穢禳之何損今怨者已衆而
君令一人禳之安能勝衆怨乎時越石父賢在縲紲
之中晏子出遭之塗解左驂贖之載與歸弗謝入閨
久之越石父請絕晏子懼然攝衣冠謝曰嬰雖不仁

免子於難何子求絕之速也石父曰不然吾聞君子
詘於不知已而伸於知已者方吾在縲紲之中彼不
知我也夫子旣以感悟而贖我是知已矣知已而無
禮固不如在縲紲之中晏子於是延入爲上客晏子
爲相時出其御之妻從門闕見其夫擁大蓋策駟馬
意氣甚自得已而歸其妻耻之請去其後夫乃自抑
損晏子恠而問之御以實對晏子薦以爲大夫晏子
卒有子曰圍

公孫僑

鄭公孫僑字子產簡公元年鄭人欲媚於晉使子產

之父。子國及子耳侵蔡，獲蔡公子燮。鄭人皆喜。子產曰：「小國無文德而有武功，禍莫大焉。」楚人來討，能勿從乎？從之。晉師必至，晉楚伐鄭。自今，鄭國不十五年弗得寧矣。子國怒之曰：「爾何知國有大命而有正卿童子言焉，將爲戮矣。」三年，盜殺子國。子產攻盜，殺之。子孔當國，爲載書以位序聽政。辟大夫諸司門，子不順，將誅之。子產止之，請焚書以安衆。十二年，子產始爲卿。十五年，晉人來徵朝。子產辭而卻之。及范宣子爲政，諸侯之幣重。鄭人患之。公如晉，子產寓書於子西，以告宣子。宣子說，乃輕幣。十八年，子展伐陳有功。

使子產獻捷於晉戎服將事晉人問陳之罪對曰昔
虞闕父爲周陶正以服事我先王我先王賴其利器
用也與其神明之後也庸以元女太姬配胡公而封
諸陳以備三恪則我周之自出至於今是賴桓公之
亂蔡人欲立其出我先君莊公奉五父而立之蔡人
殺之我又與蔡人奉戴厲公至於莊宣皆我之自立
夏氏之亂成公播蕩又我之自入君所知也今陳忘
周之大德蔑我大惠棄我姻親介恃楚衆以馮陵我
敝邑不可億逞我是以有往年之告未獲成命則有
我東門之後當陳隧者井堙木刊敝邑大懼不競而

耻大姬天誘其衷啓敝邑心陳知其罪授手於我用
敢獻功晋人曰何故侵小對曰先王之命唯罪所在
各致其辟且昔天子之地一圻列國一列自是以衰
今大國多數圻矣若無侵小何以至焉晋人曰何故
戎服對曰我先君武莊爲平桓卿士城濮之役文公
布命曰各復舊職命我文公戎服輔王以授楚捷不
敢廢王命故也士莊伯不能詰復於趙文子文子曰
其辭順犯順不祥乃受之初晋侯嬖程鄭使佐下軍
鄭行人公孫揮如晋聘程鄭問焉曰敢問降階何由
子羽不能對歸以語宗蔑然明然明曰是將死矣不

然將亡貴而知懼懼而思降乃得其階下人而已又何問焉且夫既登而求降階者知人也不在程鄭其有亡釁乎不然其有惑疾將死而憂也明年程鄭卒子產始知然明問爲政焉對曰視民如子見不仁者誅之如鷹鷂之逐鳥雀也子產喜以語子太叔曰他日吾見蒺藜之面而已今吾見其心矣子太叔嘗問政子產曰政如農功日夜思之思其始以成其終朝夕而行之行無越思如農之有畔其過鮮矣簡公以入陳之功享子展賜之先路三命之服先八邑賜子產次路再命之服先六邑子產辭邑曰自上以下降殺

以兩禮也臣之位在此且子展之功也臣不敢及賞
禮請辭邑公固與之乃受三邑十九年楚人及秦人
侵鄭印堇父與皇頡戍城麋楚人囚之以獻於秦鄭
人取貨於印氏以請之子太叔爲令正以爲請子產
曰不獲受楚之功而取貨於鄭不可爲國秦不其然
若曰拜君之勤鄭國微君之惠楚師其猶在敝邑之
城下其可弗從遂行秦人不予更幣從子產而後獲
之二十年許靈公如楚請伐鄭楚人從之遂伐鄭鄭
人將禦之子產曰晉楚將平諸侯將和楚王是故昧
於一來不如使逞而歸乃易成也夫小人之性釁於

勇嗇於禍以足其性而求名焉者非國家之利也若
何從之子展說不禦寇於是楚師入於南里墮其城
涉於樂氏門於師之梁縣門發獲九人焉涉於汜而
歸二十一年子產相公如楚二十三年復相公如晉
六月如陳蒞盟是年駟帶殺良霄子皮授子產政子
產爲政使都鄙有章上下有服田有封洫廬井有伍
大夫之忠儉者從而與之泰侈者因而斃之從政一
年輿人誦之曰取我衣冠而褚之取我田疇而伍之
孰殺子產吾其與之及三年又誦之曰我有子弟子
產誨之我有田疇子產殖之子產而死誰其嗣之二

十四年六月子產相公如晉晉侯以魯喪故未之見也子產使盡壞其館之垣而納車馬焉士匄讓之曰敝邑以政刑之不修寇盜充斥無若諸侯之屬辱在寡君者何以是令吏人完客所館高其閭閔厚其墻垣以無憂客使今吾子壞之雖從者能戒其若異客何以敝邑之爲盟主繕完葺墻以待賓客若皆毀之其何以共命寡君使匄請命對曰以敝邑褊小介於大國誅求無時是以不敢寧居悉索敝賦以來會時事逢執事之不閒而未得見又不獲聞命未知見時不敢輸幣亦不敢暴露其輸之則君之府實也非薦

陳之不敢輸也其暴露則恐燥濕之不時而朽蠹以重散邑之罪僑聞文公之爲盟主也宮室卑庳無觀臺榭以崇大諸侯之館館如公寢庫廐繕修司空以時平易道路巧人以時填館宮室諸侯賓至甸設庭燎僕人巡官車馬有所賓從有代巾車脂轄隸人牧圉各瞻其事百官之屬各展其物公不留賓而亦無廢事憂樂同之事則巡之教其不知而恤其不足賓至如歸無寧菑患不畏寇盜而亦不患燥濕今銅鞮之宮數里而諸侯舍於隸人門不容車而不可踰越盜賊公行而天厲不戒賓見無時命不可知若又勿

壞是無所藏幣以重罪也敢請執事將何所命之雖
君之有魯喪亦敝邑之憂也若獲薦幣修垣而行君
之惠也敢悼勤勞士句復命趙文子曰信我實不德
而以隸人之垣以羸諸侯是吾罪也使士句謝不敏
焉晉侯見鄭伯有加禮厚其宴好而歸之乃築諸侯
之館叔向曰辭之不可已也如是夫子產有辭諸侯
賴之若之何其釋辭也鄭人游於鄉校以論執政然
明謂子產曰毀鄉校何如子產曰何爲夫人朝夕退
而游焉以議執政之善否其所善者吾則行之其所
惡者吾則改之是吾師也若之何毀之我聞忠善以

左氏外傳卷一
損怨未聞作威以防怨豈不遽止然猶防川大決所
犯傷人必多吾不克救也不如小決使道不如吾聞
而藥之也然明日蔑也今而後知吾子之信可事也
小人實不才若果行此其鄭國實賴之豈惟二三臣
子皮欲使尹何爲邑子產曰少未知可否子皮曰愿
吾愛之不吾叛也使夫往而學焉夫亦愈知治矣子
產曰不可人之愛人也求利之也今吾子愛人則以
政猶未能操刀而使割也其傷實多子之愛人傷之
而已其誰敢求愛於子子於鄭國棟也棟折攘崩僑
將厭焉敢不盡言子有美錦不使人學製焉大官大

邑身之所庇也而使學者製焉其爲美錦不亦多乎
僑聞學而後入政未聞以政學者也若果行此必有
所害譬如田獵射御貫則能獲禽若未嘗登車射御
則敗績厭覆是懼何暇思獲子皮曰善哉微子之言
吾不知也他日我日子爲鄭國我爲吾家以庇焉其
可也今而後知不足自今請雖吾家聽子而行子產
曰人心之不同如其面焉吾豈敢謂子面如吾面乎
抑心所謂危亦以告也子皮以爲忠故委政焉子產
是以能爲鄭國二十五年楚令尹公子圍來聘且娶
於公孫段氏子產使館於外旣聘將以衆逆子產使

左氏外傳卷十一
十一
子羽辭曰以敝邑褊小不足以從容者請墾聽命令
尹命太宰伯州犁對曰君辱貺寡大夫圍謂圍將使
豐氏撫有而室圖布几筵告於共公之廟而來若野
賜之是委君貺於草莽也是寡大夫不得列於諸卿
也不寧唯是又使圍蒙其先君將不得爲寡君老其
蔑以復矣唯大夫圖之子羽曰小國無罪恃實其罪
將恃大國之安靖已而無乃包藏禍心以圖之小國
失恃而懲諸侯使莫不憾者距違君命而有所壅塞
不行是懼不然敝邑館人之屬也其敢愛豐氏之祧
伍舉知其有備也請垂橐而入許之是年公孫黑與

公孫楚鬪子產放公孫楚於吳晉侯有疾公使子產
如晉聘且問疾晉人以實沈瑩駘爲問子產對之辯
晉侯問之曰博物君子也重賄之秋楚公子圉使公
子黑肱伯州犂城犍邲鄭人懼子產曰不害令尹
將行大事而先除二子也禍不及鄭何患焉二十六
年子產殺公孫黑二十七年公如楚子產相楚靈王
享之賦吉日旣享子產乃其田備王以田江南之夏
二十八年楚靈王求諸侯於晉晉人許之遂合諸侯
會於申子產相鄭伯先在焉椒舉言於王曰臣聞諸
侯無歸禮以爲歸今君始得諸侯其慎禮矣宋向戌

鄭公孫僑在諸侯之良也君其選焉王使問禮於向
戊與子產向戊獻公合諸侯之禮六子產獻伯子男
會公之禮六君子謂向戊善守先代子產善相小國
是年子產作丘賦國人謗之曰其父死於路已爲蠱
尾以令於國國將若何或渾罕以告子產曰何害苟
利社稷死生以之且吾聞爲善者不改其度故能有
濟也民不可逞度不可改詩曰禮義不愆何恤於人
言吾不遷矣渾罕曰國氏其先亡乎君子作法於涼
其敝猶貪作法於貪敝將如之何姬在列者蔡及曹
滕其先亡乎偪而無禮鄭先衛亡偪而無法政不率

法而制於心民各有心何上之有子產聘於晉晉侯
有疾夢黃熊入於寢門韓宣子送客私問焉對曰以
君之明子爲大政其何厲之有昔堯殛鯀於羽山其
神化爲黃熊以入于羽淵實爲夏郊三代祀之晉爲
盟主其或者未之祀也乎韓子祀夏郊晉侯有間賜
子產莒之二方鼎先是鄭伯如晉公孫段伯石相甚
敬而卑禮無遺者晉侯嘉焉授之以策曰子豐有勞
於晉國余聞而弗忘賜女州田以胙乃舊勲伯石再
拜稽首受策以出初州縣欒豹之邑也及欒氏亡范
宣子趙文子韓宣子皆欲之文子曰溫吉縣也二宣

子曰自郤稱以別三傅矣晉之別縣不唯州誰獲治
之文子病之乃舍之二子曰吾不可以正議而自與
也皆舍之及文子爲政趙獲曰可以取州矣文子曰
退二子之言義也違義禍也余不能治余縣又焉用
州其以徼禍也君子曰弗知實難知而弗從禍莫大
焉有言州必死豐氏故主韓氏伯石之獲州也韓宣
子爲之請爲其復取之之故公孫段旣死子產爲段
于豐施歸州田於晉韓宣子辭之子產曰古人有言
曰其父析薪其子弗克負荷施將懼不能任其先人
之祿其况能任大國之賜縱吾子爲政而可後之人

君屬有疆場之言敝邑獲戾而豐氏受其大討吾子
取州是免敝邑於戾而建置豐氏也敢以爲請宣子
受之晉之莖平公也子皮如晉將以幣行子產曰喪
焉用幣用幣必百兩百兩必千人千人至將不行不
行必盡用之幾千人而國不亡子皮固請以行旣莖
諸侯之大夫欲因見新君叔向辭之子皮盡用其幣
歸謂子羽曰非知之難將在行之夫子知之矣我則
不足三十六年簡公卒定公元年晉會諸侯於平丘
子產子太叔相公以會子產以幄幕九張行子太叔
以四十旣而悔之每舍損焉及會亦如之旣而尋盟

晉令諸侯日中造於除癸酉退朝子產命外僕速張於除子太叔止之使待明日及夕子產聞其未張也使速往乃無所張矣及盟子產爭承晉人許之晉韓宣子來聘宣子有環其一在鄭商宣子謁諸公子產弗與曰非官府之守器也寡君不知韓子買諸賈人既成賈矣商人曰必告君大夫韓子請諸子產子產對曰昔我先君桓公與商人皆出自周庸次比耦以艾殺此地斬之蓬蒿藜藿而共處之世有盟誓以相信也日爾無我叛我無疆賈母或句奪爾有利市寶賄我勿與知恃此質誓故能相保以至於今今吾子

以好來辱謂敝邑疆奪商人是教敝邑背盟誓也毋
乃不可乎吾子得玉而失諸侯必不爲也若大國令
而共無藝鄭鄙邑也亦弗爲也僑若獻王不知所成
敢私布之韓子辭王曰起不敏敢求玉以徼二罪敢
辭鄭六卿餞宣子宣子請皆賦以見鄭志旣皆賦宣
子賦我將子產拜使五卿皆拜曰吾子靖亂敢不拜
德宣子私覲於子產以玉與馬曰子命起舍夫玉是
賜我玉而免吾死矣敢藉手以拜六年子產爲鄭火
故乃簡兵大蒐將爲蒐除蒐庭子太叔之廟在道南
其寢在道北其庭小過期三日使除徒陳於道南廟

北曰子產過女而命速除乃毀於而向子產朝過而怒之除者南毀子產及衝使從者止之曰毀于北方火之作也子產授兵登陴備之邊吏來讓子產對曰若吾子之言敝邑之災君之憂也敝邑失政天降之災又懼讒慝之間謀之以啓貪人荐爲敝邑不利以重君之憂幸而不亡猶可謫也不幸而亡君雖憂之亦無及也鄭有他境望走在晉既事晉矣敢有二心八年子產有疾謂子太叔曰我死子必爲政唯有德者能以寬服民其次莫如猛夫火烈民望而畏之故鮮死焉水懦弱民狎而翫之則多死焉故寬難疾數

月而卒太叔爲政不忍猛而寬鄭國多盜取人於萑
符之澤太叔悔之曰吾早從夫子不及此興徒兵以
攻萑符之盜盡殺之盜乃少止子產爲政擇能而使
之馮簡子能斷大事子太叔美秀而文公孫揮能知
四國之爲而辯於其大夫之族姓班位貴賤能否而
又善爲辭令裨諶能謀於野則獲謀於邑則否鄭
國將有諸侯之事子產厲問四國之爲於子羽且使
多爲辭令與裨諶乘以適野使謀可否而告馮簡子
使斷之事成乃授子太叔使行之以應對賓客是以
鮮有敗事孔子嘗過鄭與子產如兄弟及聞子產死

曰古之遺愛也兄事子產云

鮑叔牙

齊鮑叔牙齊大夫公子小白傳也初襄公在位不恤國政鮑叔牙曰君使民慢亂將作矣遂奉小白奔莒及無知搆難公子糾爭立小白乃自莒入齊是爲桓公桓公立取糾殺之管仲在魯懼誅不敢歸鮑叔言於公曰臣君之庸臣也君如惠於臣使不凍餒則是君之賜也若必治國家者則非臣之所能也其唯管夷吾乎臣之所不如夷吾者五寬惠柔民弗若也治國家不失其柄弗若也忠信可結於百姓弗若也制

禮義可法於四方弗若也執枹鼓立於軍門使百姓皆加勇焉弗若也桓公曰夫夷吾射寡人中鉤是以濱於死鮑叔對曰夫爲其君勤也君若宥而反之夫猶是也桓公曰若何鮑子對曰請諸魯桓公曰施伯魯君之謀臣也夫知吾將用之必不予我矣若之何鮑子對曰使人請諸魯曰寡君有不令之臣在君之國欲以戮之於群臣故請之則予我矣桓公使請諸魯如鮑叔之言魯莊公以聞施伯施伯對曰此非欲戮之也欲用其政也夫管子天下之才也所在之國則必得志於天下令彼在齊則必長爲魯國憂矣莊

公曰若何施伯曰殺而以其屍授之莊公將殺管仲
齊使者請曰寡君欲以親爲戮若不生得以戮於群
臣猶未得請也請生之於是莊公使束縛以予齊使
遂受之而退管仲相凡內修政事外連諸侯桓公必
質之鮑叔鮑叔曰公必行夷吾之言公乃行之故桓
公九合諸侯一匡天下雖仲之力亦鮑叔左右之也
管仲嘗曰吾始困時嘗與鮑叔買分財利多自與鮑
叔不以我爲貪知我貧也吾嘗爲鮑叔謀事而處困
窮鮑叔不以我爲愚知時有利不利也吾嘗三仕三
見逐鮑叔不以我爲不肖知我不遭時也吾嘗三戰

三走鮑叔不以我爲怯知我有老母也公子糾敗召
忽死之吾幽囚受辱鮑叔不以我爲無耻知我不羞
小節而耻功名不顯於天下也生我者父母知我者
鮑子也桓公嘗飲酒酣謂鮑叔曰闔不起爲寡人壽
乎鮑叔牙捧觴而起曰使公無忘出如莒時也使管
子毋忘束縛在魯也使甯戚毋忘飯牛車下也桓公
辟席再拜曰寡人與二大夫能無忘夫子之言則國
之社稷必不危矣管仲寢疾桓公徃問之曰仲父不
幸而不起此疾彼政我將安移之仲未對公且問鮑
叔之爲人對曰鮑叔君子也千乘之國不以其道予

之不受也雖然不可以爲政其爲人好善而惡惡已甚見一惡終身不忘其隰朋乎仲卒隰朋亦卒公卒委政易牙豎刁開方而齊遂亂

鬪子文

楚鬪子文伯比子初若敖娶於邲生伯比若敖卒伯比從母畜於邲通於邲子之女生子文邲夫人使棄諸夢虎乳之邲子田見之懼而歸夫人以告遂使收之楚人謂乳穀謂虎於菟故命之曰鬪穀於菟而以其女妻伯比成王八年令尹子元見殺使子文爲令尹子文賢以楚之多故也自毀其家以紓國難十七

年子文帥師滅弦方是時齊桓公霸江黃道桓方睦於齊皆弦姻也弦子恃之而不事楚又不設備故亡三十二年隨以漢東諸侯叛楚子文帥師伐之取成而還會成得臣伐陳取焦夷及城頓子文以爲之功使爲令尹叔伯曰子若國何對曰吾以靖國也夫有大功而無貴仕其人能靖者與有幾故遂相之初子文爲令尹其族有干法者廷理拘之聞其令尹之族也遂釋之子文讓之曰凡立廷理所以司法也故直士持法柔而不撓剛而不折吾爲令尹以率士民士民或怨吾而不能勉之於法吾族之犯法甚明而使

廷理因緣吾心而釋之是吾不公著於國也執國之
政而以私聞與其生以無義不若有死而已廷理懼
而刑之成王聞之不及履而至子文之室曰寡人幼
致廷理失其人以違夫子之意乃出廷理國人歌之
子文爲令尹四十年繒布之衣以朝鹿裘以處家無
一日之積王聞之於是每朝設一束脯一筐糗以益
子文之祿子文逃之王止而後復或謂人生求富子
逃之何也曰夫從政所以庇民也民常貧而我取富
是勤民以自封也死無日矣我逃死非逃富也弟子
良爲司馬生子越椒子文曰必殺之是子也能虎之

狀而豺狼之聲弗殺必滅若敖氏子良不可子文以
爲大感及將死聚其族曰椒也知政乃速行無及於
難且泣曰鬼猶求食若敖氏之鬼不其餒而及子文
子鬬般爲令尹越椒與蔦賈譖鬬般殺之而居其位
旣又惡蔦賈復殺之遂處於烝野將攻王王以文成
穆三王之子爲質弗受戰於臯澣椒敗遂滅若敖氏
子文之孫箴尹克黃使於齊還及宋聞亂其人曰不
可以入矣箴尹曰棄君之命獨誰受之君天也天可
逃乎遂歸復命而自拘於司敗王思子文之治曰子
文無後何以勸善使復其所改命曰生其子孫當昭

王時爲郟公

樂喜

宋樂喜字子罕戴公之子公子衎之後也平公五年
華羽與樂轡子蕩少相狎長相優又相謗也子蕩怒
以弓梏華羽於朝公見之曰司武而梏於朝難以勝
矣遂逐之子罕時爲司城曰同罪異罰非刑也專戮
於朝罪孰大焉亦逐子蕩子蕩射子罕之門曰幾日
而不我從子罕善之如初十二年宋災樂喜爲政使
伯氏司里大所未至撤小屋塗大屋陳畚揭具緆缶
備水噐量輕重蓄水潦積土塗廵丈城繕守備表大

道使華臣具正徒令隧正納郊保奔火所使華閣討
右官官庀其司向戊討左亦如之使樂端庀刑器亦
如之使皇郎命校正出馬工正出車備甲兵庀武守
使西鉏吾庀府守令司宮巷伯徹宮二師令四鄉正
敬享祝宗用馬於四墉祀盤庚於西門之外初鄭尉
氏司氏之亂其餘盜在宋鄭人以子西伯有子產之
故十八年賂宋以馬四十乘與師蒞師慧三月公孫
黑爲質焉子罕以堵女父尉翩司齊與之良司臣而
逸之託諸季武子武子寘諸下鄭人醢之三人也師
慧過朝將私焉相曰朝也慧曰無人焉相曰朝也何

故無人慧曰必無人焉若猶有人豈其以千乘之相
易淫樂之媵必無人焉故也子罕聞之固請而歸之
宋人或得玉獻諸子罕子罕弗受獻玉者曰以示玉
人玉人以爲寶也故敢獻之子罕曰我以不貪爲寶
爾以玉爲寶若以與我皆喪寶也不若人有其寶稽
首而告曰小人懷璧不可以越鄉納此以請死也子
罕寘諸其里使玉人爲之攻之富而後使復其所皇
國父爲大宰爲平公築臺妨於農收子罕請俟農功
之畢公弗許築者謳曰澤門之哲實興我役邑中之
黔實慰我心子罕聞之親執扑以行築者而拱其不

勉者曰吾儕小人皆有闔廬以辟燥濕寒暑今吾君
爲一臺而不速成何以爲役謳者乃止或問其故子
罕曰宋國區區而有詛有祝禍之本也及向戌之議
偃兵也旣會諸侯歸而請賞曰請免死之邑公與之
邑六十以示子罕子罕曰凡諸侯小國晉楚所以兵
威之畏而後上下慈和慈和而後能安靖其國家以
事大國所以存也無威則驕驕則亂生亂生必滅所
以亡也天生五材民並用之廢一不可誰能去兵兵
之設久矣所以威不軌而昭文德也聖人以興亂人
以廢廢興存亡昏明之術皆兵之由也而子求去之

不亦誣乎以誣道蔽諸侯罪莫大焉縱無大討而又
求賞無厭之甚也削而投之左師辭邑向氏欲攻之
左師曰我將亡夫子存我德莫大焉又可攻乎晉人
欲伐宋使人覘之陽門之介夫死子罕入而哭之哀
覘宋者反報於晉侯曰陽門之介夫死司城哭之哀
而民說殆不可伐也孔子聞之曰善哉覘國乎凡民
有喪匍匐救之雖微晉而已天下其孰能當之

范蠡

范蠡本南陽人家於越初濮上人計然博學無所不
通尤善計筭南游於越范蠡師事之得其術以事越

王句踐既苦身戮力與勾踐深謀二十餘年竟滅吳
報會稽之耻北渡兵於淮以臨齊晉號令中國以尊
周室勾踐以霸而范蠡稱上將軍還反國范蠡以爲
大名之下難以久居且勾踐爲人可與同患難與處
安爲書辭勾踐曰臣聞主憂臣勞主辱臣死昔者君
王辱於會稽所以不死爲此事也今既以雪耻臣請
從會稽之誅勾踐曰孤將與子分國而有之不然將
加誅於子范蠡曰君行令臣行意乃裝其輕寶珠玉
自與其私徒屬乘舟浮海以行終不反於是勾踐表
會稽山以爲范蠡奉邑范蠡浮海出齊變姓名自謂

鴟夷子皮。耕於海畔。苦身戮力。父子治產。居無幾何。致產數千萬。齊人聞其賢。以爲相。范蠡喟然嘆曰。居家則致千金。居官則致卿相。此布衣之極也。久受尊名。不祥。乃歸相印。盡散其財。以分與知友鄉黨。而懷其重寶。間行以去。止於陶。以爲此天下之中。交易有無之路。通爲生。可以致富矣。於是自謂陶朱公。復約要父子耕畜。廢居候時。轉物逐什一之利。居無何。則致貲累巨萬。天下稱陶朱公。朱公居陶。生少子。少子及壯。而朱公中男殺人。囚於楚。朱公曰。殺人而死。職也。然吾聞千金之子。不死於市。告其少子。往視之。乃

裝黃金千鎰置楬器中。載以一牛車。且遣其少子。朱公長男固請欲行。朱公不聽。長男曰。家有長子曰家督。今弟有罪。大人不遣。乃遣少弟。是吾不肖。欲自殺。其母爲言曰。今遣少子。未必能生中子也。而先空亡長男。柰何。朱公不得已。而遣長子。爲一封書。遺故所善莊生曰。至則進千金於莊生。所聽其所爲。慎無與爭事。長男旣行。亦自私齎數百金。至楚。莊生家負郭。披藜藿。到門。居甚貧。然長男發書。進千金。如其父言。莊生曰。可疾去矣。慎毋留。即第出。勿問所以然。長男旣去。不過莊生而私留。以其私齎。獻遺楚國貴人用。

事者。莊生雖居窮閭。然以廉直聞於國。自楚王以下。皆師尊之。及朱公進金。非有意受也。欲以成事後。復歸之。以爲信耳。故金至。謂其婦也。曰。此朱公之金。有如病不宿誠。後復歸。勿動。而朱公長男不知其意。以爲殊無短長也。莊生聞時。入見楚王。言某星宿某。此則害於楚。楚王素信莊生。曰。今爲柰何。莊生曰。獨以德爲可以除之。楚王曰。生休矣。寡人將行之。王乃使使封三錢之府。楚貴人驚告朱公長男。曰。王且赦。曰。何以也。曰。每王且赦。常封三錢之府。昨暮王使使封之。朱公長男以爲赦。第固當出也。重千金。虛棄莊生。

無所爲也。乃復見莊生。莊生驚曰：「若不去邪？」長男曰：「固末也。初爲弟事，弟今議自赦，故辭生去。」莊生知其意，欲復得其金，曰：「若自入室取金，長男即自入室取金持去，獨自歡幸。」莊生羞爲兒子所賣，乃入見楚王，曰：「臣前言某星事，王言欲以修德報之，今臣出道路，皆言陶之富人朱公之子殺人囚楚，其家多持金錢，賂王左右，故王非能恤楚國而赦，乃以朱公子故也。」楚王大怒曰：「寡人雖不德耳，柰何以朱公之子而施惠乎？」今論殺朱公子，明日遂下赦令。朱公長男竟持其弟喪歸，至其母及邑人盡哀之。唯朱公獨笑曰：「吾

固知必殺其弟也。彼非不愛其弟。顧有所不能忍者也。是少與我俱見苦。爲生難。故重棄財。至如少第者。生而見我富。乘堅驅良。逐狡兔。豈知財所從來。故輕棄之。非所惜吝。前日吾所爲欲遣少子。固爲其能棄財故也。而長不能。故卒以殺其弟。事之理也。無足悲者。吾日夜固以望其喪之來也。故范蠡三徙成名於天下。非苟去而已。所止必成名。卒老死於陶。故世傳曰陶朱公。

季扎

季扎號延陵季子。吳王壽夢少子也。壽夢子四人長

諸樊次餘祭次餘昧次季札札賢夢欲立之季札讓
不可乃立諸樊攝行事當國政諸樊既除喪以父命
讓位札札謝曰曹宣公之卒諸侯與曹人不義曹君
將立子臧子臧去之以成曹君君子曰能守節矣君
義嗣也誰敢干君有國非吾節也札雖不才願附子
臧之義吳人固立札札棄其室而耕乃舍之諸樊卒
授第餘祭欲傳於次必致國於札而止以稱父意於
是封札於延陵故號曰延陵季子四年王使聘於魯
見叔孫穆子說之曰子其不得死乎好善而不能擇
人吾聞君子務在擇人吾子爲魯宗卿而任其大政

不慎舉何以堪之禍必及子

其後穆子有豎牛之禍

請觀周樂

去魯遂使齊說晏平仲曰子速納邑與政乃免於難齊國之政將有所歸未得所歸難未息也故晏子感其言遂因陳桓子納政與邑去齊使於鄭見子產如舊交曰鄭之執政侈難將至矣政必及子子爲政慎以禮不然鄭國將敗去鄭適衛說蘧瑗史狗史繇公子荆公叔發公子朝曰衛多君子未有患自衛如晉將宿於戚聞鍾聲曰異哉吾聞之辯而不德必加於戮矣夫子獲罪於君以在此孫林父逐君出奔在戚懼猶不足而又可以樂乎夫子之在此猶燕之巢於幕上君在

殯而可樂乎遂去之文子聞之終身不聽琴瑟必適晉
說趙文子韓宣子魏獻子曰晉國其萃於三家乎將
去謂叔向曰吾子勉之君侈而多良大夫皆富政將
在三家吾子好直必思自勉於難札初使過徐徐君
好札劔弗敢言札心知之爲使上國未獻還至徐徐
君已死乃解其劔繫徐君冢樹而去從者曰徐君已
死尚誰與乎札曰不然始吾心已許之豈以死倍吾
心哉十七年餘祭卒第餘昧立既餘昧卒又欲授札
札讓遜去於是吳人立餘昧之子僚爲王諸樊之子
光以爲吾父所以兄弟相傳者欲致位季子也季子

即不受國吾當立及札使於晉光乃使人弑僚而自立是爲闔廬季子至曰苟先君無廢祀民人無廢主社稷有奉國家無傾乃吾君也吾誰敢怨哀死事生以待天命非我生亂立者從之先人之道也復命哭墓復位而待至夫差十一年楚子期伐陳吳使季子救陳季子謂子期曰二君不務德而力爭諸侯民何罪焉我請退以爲子名務德而安民乃還

子臧

曹子臧名欣時宣公之庶子也魯成公十三年宣公會晉伐秦卒於師曹人使公子負芻守

子臧庶兄

使子臧

逆宣公之喪，秋，負芻殺其太子而自立，是爲成公。諸侯皆請討之。晉人以其役之勞，請俟他年。冬，曹宣公既葬，子臧不義。成公將出奔，國人聞之，亦將相率從。子臧以行，成公乃懼，自告其罪，且請留焉。於是子臧乃反而致其邑。明年，成公會諸侯同盟於戚。晉侯執之以歸於周。諸侯皆賢子臧，請於晉將見子臧於周而立之。子臧辭曰：「前志有之，曰：『聖達節，次守節，下失節。』爲君非吾節也。雖不能聖，敢失守乎？」遂逃奔宋。三年，曹人請於晉曰：「自我先君宣公，即世國人曰：『若之何？』憂猶未弭，而又討我寡君以亡曹國，社稷之鎮，公

左傳卷十一
子是大泯曹也先君無乃有罪乎若有罪則君列諸
會矣君唯不遺德刑以伯諸侯豈獨遺諸敝邑敢私
布之於是晉侯謂曹人曰荀子臧反吾歸而君子臧
不得已乃復歸於曹以待晉命既而晉人復請於周
以反成公子臧於是盡致其邑與卿而終身不仕子
名會二年會以事忤公遂出次於鄆以待公命公又
而不召遂自鄆出奔宋故春秋書曰曹公孫會自鄆
出奔宋所以表其賢者之後而能盡去國之禮也

介子推

晉介子推文公之微臣也始文公爲公子出亡從者

五人既歸而即位群臣多自以爲功推竊耻之文公
之元年秦送文公至河舅犯曰臣從君周旋天下過
亦多矣臣猶知之況於君乎請亡要文公而與之盟
時推從在船中笑曰天實開公子子犯以爲已功而
要市於君固足羞也吾不忍與同位乃自隱文公新
立周宣王以弟帶難出居鄭告急於晉文公方發兵
是以賞從亡者未至推推亦不言祿祿亦不及推曰
獻公有子九人唯君在矣惠懷無親外內棄之天未
絕晉必將有主主晉祀者非君而誰天實開之二三
子以爲已功不亦誣乎竊人之財猶謂之盜况貪天

之功以爲已力乎下義其罪上賞其姦上下相蒙難
與處矣其母曰盍亦求之以死誰懟推曰尤而效之
罪有甚焉且出怨言不食其祿母曰亦使知之若何
對曰言身之文也身欲隱安用文之文之是求顯也
其母曰能如此乎與女偕隱至死不復見推從者憐
之乃懸書宮門曰龍欲上天五蛇爲輔龍已上天四
蛇各入其宇一蛇獨怨終不見處所文公出見其書
曰此介子推也吾方憂王室未圖其功使人召之則
亡遂求所在聞其入緜上山中於是文公環緜上山
中封之以爲介推田號介山日以記吾過且旌善人

柳下惠

魯柳下惠者魯公族展氏也名禽仕魯爲士師三黜
不去人曰子未可以去乎曰直道而事人焉往而不
三黜枉道而事人何必去父母之邦故魯雖不能用
終身不去魯僖公二十六年齊孝公侵魯僖公使展
喜犒師受命於禽以往曰寡君聞君親舉玉趾將辱
於敝邑使下臣犒執事齊侯曰魯人恐乎對曰小人
恐矣君子則否齊侯曰室如懸磬野無青草何恃而
不恐對曰恃先王之命昔周公太公股肱周室夾輔
成王成王勞之而賜之盟曰世世子孫無相害也蔽

在盟府太師職之桓公是以糾合諸侯而謀其不協
彌縫其闕而匡救其災昭舊職也及君即位諸侯之
望曰其帥桓之功我敝邑用不敢保聚曰豈其嗣世
九年而棄命廢職其若先君何君必不然恃此以不
恐齊侯乃還魯世有齊師齊嘗攻魯以求岑鼎魯因
與之齊侯以爲非也使人告魯曰柳下惠以爲是因
請受之魯公請於柳下惠柳下惠對曰君之欲以爲
岑鼎也以免國也棄臣之信以免君之國亦臣之所
難也公乃以真岑鼎徃文公六年大事於太廟於是
夏父弗忌爲宗伯將躋僖公於閔公上焉宗有司諫

曰非昭穆也夏父弗忌曰我爲宗伯明者爲昭其次
爲穆何常之有宗有司曰夫宗廟之有昭穆也以次
世之長幼而等胃之親疎也夫祀昭孝也各致齊敬
於其皇祖昭孝之至也故工史書世宗祝書昭穆猶
恐其或踰也今將先禰而後祖自玄王以及主癸莫
若湯自稷以及王季莫若文武商周之烝也未嘗躋
湯與文武爲踰也魯未若商周而改其常無乃不可
乎弗聽遂躋之展禽曰夏父弗忌必有殃夫宗有司
之言順矣僖又未有明焉犯順不祥以逆訓民亦不
祥易神之班亦不祥不明而躋之亦不祥犯鬼道二

犯人道二能無殃乎是時臧文仲為政於魯知下惠
之賢而卒不能用孔子嘗譏文仲為竊位云初下惠
三黜於魯而不去也其妻謂之曰子無乃瀆乎吾聞
之君子有二耻國無道而貴耻也國有道而賤耻也
今當亂世三黜而不云亦近耻矣下惠曰然油油之
民將蹈於害吾能已乎且彼為彼我為我雖裸裎安
能汙我由由然與之處柳下惠既死門人將誄之妻
曰將誄夫子之德邪則二三子不知妾知之也乃誄
夫子之不伐兮夫子之不竭兮夫子之信誠而與人
無害兮屈柔從俗不彊察兮蒙耻救民德彌大兮雖

遇三黜終不蔽兮愷悌以君子永能厲兮嗟乎間哉乃
下世兮庶幾遐年今遂逝兮嗚呼哀哉鬼神泄兮夫
子之謚宜曰惠兮於是門人遂從之以惠為誄云

子貢

端木賜衛人字子貢善為說辭齊田常欲作亂憚高
國鮑晏欲移其兵以伐魯孔子聞之謂門弟子曰夫
魯墳墓所處父母之國國危如此二三子何為莫出
子路請出孔子止之子張子石請行孔子弗許子貢
請行孔子許之遂行至齊說常曰君之伐魯過矣夫
魯難伐之國其城薄以卑其地狹以泄其君愚而不

仁大臣僞而無用其士民又惡甲兵之事此不可與
戰君不如伐吳夫吳城高以厚地廣以深甲堅以新
士選以飽重器精兵盡在其中又使明大夫守之此
易伐也田常忿然作色曰子之所難人之所易子之
所易人之所難而以教常何也子貢曰臣聞之憂在
內者攻強憂在外者攻弱今君憂在內吾聞君三封
而三不成者大臣有不聽者也今君破魯以廣齊戰
勝以驕主破國以尊臣而君之功不與焉則交日踈
於主是君上驕主心下恣群臣求以成大事難矣夫
上驕則恣臣驕則爭是君上與主有郤下與大臣交

爭也如此則君之立於齊危矣故曰不如伐吳伐吳
不勝民人外死大臣內空是君上無疆臣之敵下無
民人之過孤主制齊者唯君也田常曰善雖然吾兵
業已加魯矣去而之吳大臣疑我柰何子貢曰君按
兵無伐臣請徃使吳王令之救魯而伐齊君因以兵
迎之田常許之使子貢南見吳王說曰臣聞之王者
不絕世霸者無疆敵千鈞之重加銖兩而移今以萬
乘之齊而私千乘之魯與吳爭疆竊爲王危之且夫
救魯顯名也伐齊大利也以撫泗上諸侯誅暴齊以
服疆晉利莫大焉名存亡魯實困疆齊智者不疑也

吳王曰善雖然吾嘗與越戰棲之會稽越王苦身養
士有報我心子待我伐越而聽子子貢曰越之勁不
過魯吳之疆不過齊王置齊而伐越則齊已平魯矣
且王方以存亡繼絕爲名夫伐小越而畏疆齊非勇
也勇者不避難仁者不窮約智者不失時王者不絕
世以立其義今存越示諸侯以仁救魯伐齊威加晉
國諸侯必相率而朝吳霸業成矣且王必惡越臣請
東見越王令出兵以從此實空越名從諸侯以伐也
吳王大訖乃使子貢之越越王除道郊迓身御至舍
而問曰此蠻夷之國大夫何以儼然辱而臨之子貢

曰今者吾說吳王以救魯伐齊其志欲之而畏越曰
待我伐越乃可如此破越必矣且夫無報人之志而
令人疑之拙也有報人之意使人知之殆也事未發
而先聞危也三者舉事之大患勾踐頓首再拜曰孤
嘗不料力乃與吳戰困於會稽痛入於骨髓日夜焦
唇乾舌徒欲與吳王接踵而死孤之願也子貢曰吳
王爲人猛暴群臣不堪國家散於數戰士卒弗忍百
姓怨上大臣內變子胥以諫死太宰嚭用事順君之
過以安其私是殘國之治也今王誠發士卒佐之以
徼其志重寶以說其心卑辭以尊其禮其伐齊必也

彼戰不勝王之福矣戰勝必以兵臨晉臣請北見晉君令共攻之弱吳必矣其銳兵盡於齊重甲困於晉而王制其敝此滅吳必矣越王大說許諾送子貢金百鎰劍一良矛二子貢不受遂行報吳王曰臣敬以大王之言告越王越王大怒曰孤不幸少失先人內不自量抵罪於吳軍敗身辱棲於會稽國爲虛莽賴大王之賜使得奉俎豆而修祭祀死不敢忘何謀之敢慮後五日越使大夫種頓首言於吳王曰東海後臣孤勾踐使者臣種敢修下吏問於左右今竊聞大王將興大義誅疆救弱困暴齊而撫周室請悉起境

內士卒三千人孤請自被墜執銳以先受矢石因越
賤臣種奉先人截罷甲二十領屈盧之矛步光之劍
以賀軍吏吳王大說以告子貢曰越王欲身從寡人
伐齊可乎子貢曰不可夫空人之國悉人之衆又從
其君不義君受其幣許其師而辭其君吳王許諾乃
謝越王於是吳王乃遂發九郡兵伐齊子貢因去之
晉謂晉君曰臣聞之慮不先定不可以應卒兵不先
辯不可以勝敵今夫齊與吳將戰彼戰而不勝越亂
之必矣與齊戰而勝必以其兵臨晉晉君大恐曰爲
之柰何子貢曰修兵休卒以待之晉君許諾子貢去

左氏如左卷十一
三十五

而之魯吳王果與齊人戰於艾陵大破齊師獲七將
軍之兵而不歸果以兵臨晉與晉人相遇黃池之上
吳晉爭疆晉人擊之大敗吳師越王聞之涉江襲吳
去城七里而軍吳王聞之去晉而歸與越戰於五湖
三戰不勝城門不守越遂圍王宮殺夫差而戮其相
破吳三年東向而霸故子貢一出存魯亂齊破吳疆
晉而霸越子貢一使使勢相破十年之中五國各有
變子貢好廢舉與時轉貨其喜揚人之美不能匿人
之過常相魯衛家累千金卒終於齊

唐荆川先生編纂左氏始末卷之十一

唐荆川先生編纂左氏始末卷之十二

禮樂

桓公五年秋大雩書不時也凡祀啓蟄而郊龍見而雩始殺而嘗閉蟄而蒸過則書

僖公三十一年夏四月四卜郊不從乃免牲非禮也猶三望亦非禮也禮不卜常祀而卜其牲日牛卜日曰牲牲成而卜郊上怠慢也望郊之細也不郊亦無望可也

襄公七年夏四月三卜郊不從乃免牲孟獻子曰吾乃今而後知有卜筮夫郊祀后稷以祈農事也是故

蟄啓而郊郊而後耕今既耕而卜郊宜其不從也

僖公五年春王正月辛亥朔日南至公既視朔遂登

觀臺以望而書禮也凡分至啓閉必書雲物爲備故

也

文公元年於是閏二月非禮也先王之正時也履端

於始舉正於中歸餘於終履端於始序則不愆舉正

於中民則不惑歸餘於終事則不悖

文公六年閏月不告朔非禮也閏以正時時以作事

事以厚生生民之道於是乎在矣不告閏朔棄時政

也何以爲民

文公二年秋八月丁卯大事於太廟躋僖公逆祀也
於是夏父弗忌爲宗伯尋僖公且明見曰吾見新鬼
大故鬼小先大後小順也躋聖賢明也明順禮也君
子以爲失禮禮無不順祀國之大事也而逆之可謂
禮乎子雖齊聖不先父食矣故禹不先鯀湯不先
契文武不先不窋宋祖帝乙鄭祖厲王猶上祖也是
以魯頌曰春秋匪解享祀不忒皇皇后帝皇祖后稷
君子曰禮謂其后稷親而先帝也詩曰問我諸姑遂
及伯姊君子曰禮謂其姊親而先姑也仲尼曰臧文
仲其不仁者三不知者三下展禽廢六關妾織蒲三

不仁也作虛噐縱逆祀祀爰居三不知也

僖公三十一年衛成公夢康叔曰相奪予享公命祀相甯武子不可曰鬼神非其族類不歆其祀祀鄫何事相之不享於此久矣非衛之罪也不可以門成王周公之命祀請改祀命

右吉禮

隱公元年秋七月天王使宰咺來歸惠公仲子之賵緩且子氏未薨故名天子七月而葬同軌畢至諸侯五月同盟至大夫三月同位至士踰月外姻至贈死不及尸弔生不及哀豫凶事非禮也

僖公三十三年冬十二月公薨於小寢即安也文公

二年葬僖公緩作主非禮也凡君薨卒哭而祔祔而作主特祀於主烝嘗禘於廟

成公二年八月宋文公卒始厚葬用蜃炭益車馬始用殉重噐備椁有四阿棺有翰檜君子謂華元樂舉於是乎不臣臣治煩去惑者也是以伏死而爭今二子者君生則縱其惑死又益其侈是棄君於惡也何臣之爲

昭公十二年三月鄭簡公卒將爲葬除及游氏之廟將毀焉子太叔使其除徒執用以立而無庸毀曰子產過女而問何故不毀乃曰不忍廟也諾將毀矣旣

如是子產乃使辟之司墓之室有當道者毀之則朝而壙弗毀則日中而壙子大叔請毀之曰無若諸侯之賓何子產曰諸侯之賓能來會吾喪豈憚日中無損於賓而民不害何故不爲遂弗毀日中而葬君子謂子產於是乎知禮禮無毀人以自成也

襄公十有二年秋吳子壽夢卒臨於周廟禮也凡諸侯之喪異姓臨於外同姓於宗廟同宗於祖廟同族於禰廟是故魯爲諸姬臨於周廟爲邢凡蔣茅胙祭臨於周公之廟

僖公四年許穆公卒於師葬之以侯禮也凡諸侯薨

於朝會加一等死王事加二等於是有所以哀歛
僖公八年秋禘而致哀姜焉非禮也凡夫人不薨於
寢不殯於廟不赴於同不祔於姑則弗致也
宣公八年有事於太廟襄仲卒而繹非禮也
昭公九年晉荀盈如齊逆女還六月卒於戲陽殯於
絳未葬晉平公飲酒樂膳宰屠蒯趨入請佐公使尊
許之而遂酌以飲工曰女爲君耳將司聰也辰在子
卯譌之疾日君徹宴樂學人舍業爲疾故也君之卿
佐是謂股肱股肱或虧何痛如之女弗聞而樂是不
聰也又飲外嬖嬖叔曰女爲君目將司明也服以旌

禮禮以行事事有其物物有其容今君之容非其物也而女不見是不明也亦自飲也曰味以行氣氣以實志志以定言言以出令臣實可味二御失官而君弗命臣之罪也公說徹酒初公欲廢知氏而立其外嬖爲是悛而止秋八月使荀躒佐下軍以說焉

宣公十五年秦桓公伐晉魏顆敗秦師於輔氏獲杜回秦之力人也初魏武子有嬖妾無子武子疾命顆曰必嫁是疾病則曰必以爲殉及卒顆嫁之曰疾病則亂吾從其治也及輔氏之役顆見老人結草以亢杜回杜回躓而顛故獲之夜夢之曰余而所嫁婦人

之父也爾用先人之治命余是以報

隱公八年無駭卒羽父請謚與族公問族於衆仲衆
仲對曰天子建德因生以賜姓昨之土而命之氏諸
侯以字爲謚因以爲族官有世功則有官族邑亦如
之公命以字爲展氏

襄公十七年齊晏桓子卒晏嬰麗纒斬直經帶杖菅
屨食鬻居倚廬寢苦枕草其老曰非太夫之禮也曰

唯卿爲大夫

右喪禮

莊公二十五年夏六月辛未朔日有食之鼓用牲於
社非常也唯正月之朔慝未作日有食之於是乎用

幣於社伐鼓於朝秋大水鼓用牲於社於門亦非常也凡天災有幣無牲非日月之眚不鼓昭公十七年夏六月甲戌朔日有食之祝史請所用幣昭子曰日有食之天子不舉伐鼓於社諸侯用幣於社伐鼓於朝禮也平子禦之曰止也唯正月朔慝未作日有食之於是乎有伐鼓用幣禮也其餘則否太史曰在此月也日過分而未至三辰有災於是乎百官降物君不舉辟移時樂奏鼓祝用幣史用辭故夏書曰辰不集於房瞽奏鼓嗇夫馳庶人走此月朔之謂也當夏四月謂之孟夏平子弗從

成公五年梁山崩晉侯以傅召伯宗伯宗辟重曰辟
傅重人曰待我不如捷之速也問其所曰絳人也問
絳事焉曰梁山崩將召伯宗謀之問將若之何曰山
有朽壤而崩可若何國主山川故山崩川竭君爲之
不舉降服乘縵徹樂出次祝幣史辭以禮焉其如此
而已雖伯宗若之何伯宗請見之不可遂以告而從
之

僖公二十一年夏大旱公欲焚巫尪臧文仲曰非旱
備也修城郭貶食省用務穡勸分此其務也巫尪何
爲天欲殺之則如勿生若能爲旱焚之滋甚公從之

是歲也饑而不害

昭公十六年鄭大旱使屠擊祝款豎祔有事於桑山
斬其木不雨子產曰有事於山執山林也而斬其木
其罪大矣奪之官邑

昭公十九年鄭大水龍鬪於時門之外洧淵國人請
為禱焉子產弗許曰我鬪龍不我覲也龍鬪我獨何
覲焉禳之則彼其室也吾無求於龍龍亦無求於我
乃止

公

年宋災樂喜為政使伯氏司里火所未至

撤小屋塗大屋陳畚揭具綆缶備水器量輕重蓄水

潦積土塗巡丈城繕守備表火道使華臣具正徒令
遂正納郊保奔火所使華閱討右官官庀其司向戍
討左亦如之使樂遄庀刑器亦如之使皇鄖正出馬
工正出車備甲兵庀武守使西鉏吾庀守令司官巷
伯儆宮一師令四鄉正敬享祝宗用馬於四墉祀盤
庚於西門之外

昭公十八年夏五月宋衛陳鄭災鄭之未災也里析
告子產曰將有大祥民震動國幾亡吾身泯焉弗良
及也國遷其可乎子產曰雖可吾不足以定遷矣及
火里析死矣未塋子產使輿三十人遷其柩火作子

產辭晉公子公孫於東門使司寇出新客禁舊客勿
出於宮使子寬子上巡群屏攝至於大宮使公孫登
徙大龜使祝史徙主祔於周廟告於先君使府人庫
人各儆其事商成公儆司宮出舊宮人寘諸火所不
及司馬司寇列居火道行火所燼城下之人伍列登
城明日使野司寇各保其徵郊人助祝史除於國北
禳火於玄冥回祿祈於四鄰書焚室而寬其征與之
材三日哭國不市使行人告於諸侯宋衛皆如是陳
不救火許不弔災君子是以知陳許之先亡也

哀公三年司繹火火踰公宮桓僖災救火者皆曰顧

府南宮敬叔至命周人出御書俟於宮曰庀女而不
在死子服景伯至命宰人出禮書以待命命不共有
常刑校人乘馬巾車脂轄百官官備府庫慎守官人
肅給濟濡帷幕鬱攸從之蒙茸公屋自大廟始外內
以悛助所不給有不用命則有常刑無赦公父文伯
至命校人駕乘車季桓子至御車立於象魏之外命
救火者傷人則止財可爲也命藏象魏曰舊章不可
亡也富父槐至曰無備而官辦者猶拾潘也於是乎
去表之橐道還公宮孔子在陳聞火曰其桓僖
桓僖親盡
而廟乎
不毀乎

襄公三十年宋大災宋伯姬卒待姆也君子謂宋共
姬女而不婦女待人婦義事也

襄公十一年春季武子將作三軍告叔孫穆子曰請
爲三軍各征其軍穆子曰政將及子子必不能武子
固請之穆子曰然則盟諸乃盟諸僖閔詛諸五父之
衢正月作三軍三分公室而各有其一三子各毀其
乘季氏使其乘之人以其役邑入者無征不入者倍
征孟氏使半爲臣若子若弟叔孫氏使盡爲臣不然
不舍昭公五年舍中軍卑公室也四分公室季氏擇
二二子各一皆盡征之而貢於公

襄公十九年諸侯同圍齊季武子以所得於齊之兵作林鍾而銘魯功焉臧武仲謂季孫曰非禮也夫銘天子令德諸侯言時計功大夫稱伐今稱伐則下等也計功則借人也言時則妨民多矣何以爲銘且夫大伐小取其所得以作彝器銘其功烈以示子孫昭明德而懲無禮也今將借人之力以救其死若之何銘之小國幸於大國而昭所獲焉以怒之亡之道也成公九年欒書伐鄭鄭人使伯蠲行成晉人殺之非禮也兵交使在其間可也

莊公三十一年夏六月齊侯來獻戎捷非禮也凡諸

左氏始考卷十一
九
侯有四夷之功則獻於王王以警於夷中國則否諸侯不相遺俘

桓公四年春正月公狩于郎書時禮也六年秋大閱簡車馬也 右軍禮

公十八年春虢公晉侯朝王王饗醴命之宥皆賜玉五鼓馬三匹非禮也王命諸侯名位不同禮亦異數不以禮假人

宣公十六年晉侯使士會平王室定王享之原襄公相禮殺烝士會私問其故王聞之召士會曰季氏而弗聞乎王享有體薦宴有折俎公當享卿當宴王室

之禮也

僖公三十年王使周公閱來聘饗有昌歠白黑形塩
辭曰國君文足昭也武可畏也則有備物之饗以象
其德薦五味羞嘉穀鹽虎形以獻其功吾何以堪之
隱公十一年滕侯薛侯來朝爭長薛侯曰我先封滕
侯曰我周之卜正也薛庶姓也我不可以後之公使
羽父請於薛侯曰君與滕君辱在寡人周諺有之曰
山有木工則度之賓有禮主則擇之周之宗盟異姓
爲後寡人若朝於薛不敢與諸任齒君若辱覲寡人
則願以滕君爲請薛侯許之乃長滕侯

定公十年夾谷之會齊侯將饗公孔子謂梁丘據曰
犧象不出門嘉樂不野合饗而既具是棄禮也若其
不具用秕稗也用秕稗君辱棄禮名惡子盍圖之夫
享所以昭德也不昭不如其已也乃不果享

隱公七年滕侯卒不書名未同盟也凡諸侯同盟於
是稱名故薨則赴以名告終稱嗣也以繼好息民謂
之禮經

成公三年晉侯使荀庚來聘且尋盟衛侯使孫良夫
來聘且尋盟公問諸臧宣叔曰中行伯之於晉也其
位在三孫子之於衛也位爲上卿將誰先對曰次國

之上卿當大國之中中當其下下當其上大夫小國之上卿當大國之下卿中當其上大夫下當其下大夫上下如是古之制也衛在晉不得爲次國晉爲盟主其將先之丙午盟晉丁未盟衛禮也

文公四年衛甯武子來聘公與之宴爲賦湛露及彤弓不辭又不荅賦使行人私焉對曰臣以爲肄業及之也昔諸侯朝正於王王宴樂之於是乎賦湛露則天子當陽諸侯用命也諸侯敵王所愾而獻其功王於是乎賜之彤弓一彤矢百茲弓矢千以覺報宴今陪臣來繼舊好君辱貺之其敢干大禮以自取戾

襄公四年穆叔如晉報知武子之聘也晉侯享之金
奏肆夏之三不拜工歌文王之三又不拜歌鹿鳴之
三三拜韓獻子使行人子員問之曰子以君命辱於
敝邑先君之禮藉之以樂以辱吾子吾子舍其大而
重拜其細敢問何禮也對曰三夏天子所以享元侯
也使臣弗敢與聞文王兩君相見之樂也臣不敢及
鹿鳴君所以嘉寡君也敢不拜嘉四牡君所以勞使
臣也敢不重拜皇皇者華君教使臣曰必諮於周臣
聞之訪問於善爲咨咨親爲詢咨禮爲度咨事爲諏
咨難爲謀臣獲五善敢不重拜

昭公十七年秋鄰子來朝公與之宴昭子問焉曰少皞氏以鳥名官何故也鄰子曰吾祖也我知之昔者黃帝氏以雲紀故爲雲師而雲名炎帝氏以火紀故爲火師而火名共工氏以水紀故爲水師而水名大皞氏以龍紀故爲龍師而龍名我高祖少皞摯之立也鳳鳥適至故紀於鳥爲鳥師而鳥名鳳鳥氏歷正也玄鳥氏司分者也伯趙氏司至者也青鳥氏司啓者也丹鳥氏司閉者也祝鳩氏司徒也睢鳩氏司馬也鴈鳩氏司空也爽鳩氏司寇也鷓鳩氏司事也五鳩鳩民者也五雉爲五工正利器用正度量夷民者

也九扈爲九農正扈民無淫者也自顓頊以來不能
紀遠乃紀於近爲民師而命以民事則不能故也仲
尼聞之見於郟子而學之旣而告人曰吾聞之天子

失官學在四夷猶信

右賓禮

桓公六年子同生以太子生之禮舉之接以大牢卜
士負之士妻食之公與文姜宗婦命之公問名於申
孀對曰各有五有信有義有象有假有類以名生爲
信以德命爲義以類命爲象取於物爲假取於父爲
類不以國不以官不以山川不以隱疾不以畜牲不
以噐幣周人以諱事神名終將諱之故以國則廢名

以官則廢職以山川則廢主以畜牲則廢祀以器幣
則廢禮晉以僖侯廢司徒宋以武公廢司空先君獻
武廢二山是以大物不可以命公曰是其生也與吾
同物命之曰同

襄公九年公送晉侯晉侯以公宴於河上問公年季
武子對曰會於沙隨之歲寡君以生晉侯曰十二年
矣是謂一終一星終也國君十五而生子冠而生子
禮也君可以冠矣大夫盍爲冠具武子對曰君冠必
以裸享之禮行之以金石之樂節之以先君之祧處
之今寡君在行未可具也請及兄弟之國而假備焉

晉侯曰諾公還及衛冠於成公之廟假鍾磬焉禮也
桓公三年公子翬如齊逆女修先君之好故曰公子
齊侯送姜氏非禮也凡公女嫁於敵國姊妹則上卿
送之以禮於先君公子則下卿送之於大國雖公子
亦上卿送之於天子則諸卿皆行公不自送於小國
則上大夫送之

文公四年逆婦姜於齊卿不行非禮也君子是以知
出姜之不允於魯也曰貴聘而賤逆之君而卑之立
而廢之棄信而壞其主在國必亂在家必亡不允宜
哉詩云畏天之威於時保之敬主之謂也

莊公二十四年哀姜至公使宗婦覲用幣非禮也御
孫曰男贄大者玉帛小者禽鳥以章物也女贄不過
榛栗棗脩以告虔也今男女同贄是無別也男女之
別國之大節也而由夫人亂之無乃不可乎

隱公八年四月甲辰鄭公子忽如陳逆婦媯辛亥以
媯氏歸甲寅入於鄭陳鍼子送女先配而後祖鍼子
曰是不爲夫婦誣其祖矣非禮也何以能育

右嘉禮

昭公二十一年天王將鑄無射泠州鳩曰王其以心
疾死乎夫樂天子之職也夫音樂之輿也而鐘音之
器也天子省風以作樂器以鐘之輿以行之小者不

窕大者不櫛則和於物物和則嘉成故和聲入於耳
而藏於心心億則樂窕則不咸櫛則不容心是以感
感實生疾今鐘櫛矣王心弗堪其能久乎
襄公二十九年吳公子札來聘請觀於周樂使工爲
之歌周南召南曰美哉始基之矣猶未也然勤而不
怨矣爲之歌邶鄘衛曰美哉淵乎憂而不困者也吾
聞衛康叔武公之德如是是其衛風乎爲之歌王曰
美哉思而不懼其周之東乎爲之歌鄭曰美哉其細
已甚民弗堪也是其先亡乎爲之歌齊曰美哉泱泱
乎大風也哉表東海者其大公平國未可量也爲之

歌豳曰美哉蕩乎樂而不淫其周公之東乎爲之歌
秦曰此之謂夏聲夫能夏則大大之至也其周之舊
乎爲之歌魏曰美哉颯颯乎大而婉險而易行以德
輔此則明主也爲之歌唐曰思深哉其有陶唐氏之
遺民乎不然何憂之遠也非令德之後誰能若是爲
之歌陳曰國無主其能久乎自鄆以下無譏焉爲之
歌小雅曰美哉思而不貳怨而不言其周德之衰乎
猶有先王之遺民焉爲之歌大雅曰廣哉熙熙乎曲
而有直體其文王之德乎爲之歌頌曰至矣哉直而
不倨曲而不屈邇而不偏遠而不攜遷而不淫復而

不厭哀而不愁樂而不荒用而不匱廣而不宣施而不費取而不貪處而不底行而不流五聲和八風平節有度守有序盛德之所同也見舞象箛南籥者曰美哉猶有憾見舞大武者曰美哉周之盛也其若此乎見舞韶濩者曰聖人之弘也而猶有慙德聖人之難也見武大夏者曰美哉勤而不德非禹其誰能修之見舞韶箛者曰德至矣哉大矣如天之無不博也如地之無不載也雖甚盛德其蔑以加於此矣觀止矣若有他樂吾不敢請已

隱公五年考仲子之宮將萬焉公問羽數於衆仲對

曰天子用八諸侯用六大夫四士二夫舞所以節八音而行八風故自八以下公從之於是初獻六羽始用六佾也

方技

襄公二十八年春無冰梓慎曰今茲宋鄭其饑乎歲在星紀而淫於玄枵以有時菑陰不堪陽蛇乘龍龍宋鄭之星也宋鄭必饑玄枵虛中也枵耗名也土虛而民耗不饑何為既而宋鄭果饑裨竈曰今茲周王及楚子皆將死歲棄其次而旅於明年之次以害鳥帑

其衝鶉尾

周楚惡之十二月甲寅靈王崩乙未楚子

昭卒

昭公十五年春將禘於武宮戒百官梓慎曰禘之日
其有咎乎吾見赤黑之祲非祭祥也喪氛也其在蒞
事乎既禘叔弓蒞事籥入而卒

昭公十七年冬有星孛於大辰西及漢申湏曰彗所
以除舊布新也天事恒象今除於火火出必布焉諸
侯其有火災乎梓慎曰往年吾見之是其徵也火出
而見令茲火出而章必火入而伏其居火也久矣其
與不然乎火出於夏爲三月於商爲四月於周爲五
月夏數得天若火作其四國當之在宋衛陳鄭乎宋

大辰之虛也陳太皞之虛也鄭祝融之虛也皆火房也星孛及漢漢水祥也衛顓頊之虛也故爲帝丘其星爲大水水火之牡也其以丙子若壬午作乎水火所以合也若火入而伏必以壬午不過其見之月明年夏五月火始昏見丙子風梓慎曰是謂融風火之始也七日其火作乎戊寅風甚壬午大甚宋衛陳鄭皆火梓慎登大庭氏之庫以望之曰宋衛陳鄭也數日皆來告火

昭公七年夏四月甲辰朔日有食之晉侯問於士文伯曰誰將當日食對曰魯衛惡之衛大魯小公曰何

故對曰去衛地如魯地於是有災魯實受之其大咎其衛君乎魯將上卿公曰詩所謂彼日而食於何不臧者何也對曰不善政之謂也國無政不用善則自取謫於日月之災故政不可不慎也務三而已一曰擇人二曰因民三曰從時八月衛侯卒十一月季孫宿卒二十年春王二月己丑日南至梓慎望氣曰今茲宋有亂國幾亡三年而後彌蔡有大喪叔孫昭子曰然則戴桓也汰侈無禮已甚亂所在也自是皆如其言二十一年秋七月壬午朔日有食之公問於梓慎曰是何物也禍福何爲對曰二至二分日有食之

不爲災日月之行也分同道也至相過也其他月則
爲災陽不克也故常爲水二十四年夏五月乙未朔
日有食之梓慎曰將水叔孫昭子曰旱也日過分而
陽猶不克克必甚能無旱乎陽不克莫將積聚也是
秋大旱終如叔孫之言先是楚靈王成章華臺召諸
侯而落之昭公將行夢襄公祖梓慎曰君不果行襄
公之適楚也夢周公祖而行今襄公實祖君其不行
子服惠伯曰行先君未嘗適楚故周公祖以道之襄
公適楚矣而祖以道君不行何之三月公卒如楚
哀公十二年冬十二月螽季孫問諸仲尼仲尼曰丘

聞之火伏而後蟄者畢今火猶西流司歷過也

襄公三十年宋災晉侯問於士弱曰吾聞之宋災於是乎知有天道何故對曰古之火正或食於心或食於味以出內火是故味爲鶉火心爲大火陶唐氏之火正闕伯居商丘祀大火而火紀時焉相土因之故商主大火商人閔其禍敗之釁必始於火是以曰知其有天道也公曰可必乎對曰在道國亂無象不可知也

昭公八年石言於晉魏榆晉侯問於師曠曰石何故言對曰石不能言或馮焉不然民聽濫也抑臣又聞

之曰作事不時怨讟動於民則有非言之物而言今
宮室崇侈民力彫盡怨讟並作莫保其性石言不亦
宜乎於是晉侯方築虎祁之宮叔向曰子野之言君
子哉君子之言信而有徵故怨遠於其身小人之言
僭而無徵故怨咎及之詩曰哀哉不能言匪舌是出
唯躬是瘁哿矣能言巧言如流俾躬處休其是之謂
乎是宮也成諸侯必叛君必有咎夫子其知之矣
昭公八年楚滅陳晉侯問於史趙曰陳其遂亡乎對
曰未也公曰何故對曰陳顓頊之族也歲在鶉火是
以卒滅陳將如之今在析木之津猶將復由且陳氏

得政於齊而後陳卒亡自幕至於瞽瞍無違命舜重之以明德寘德於遂遂世守之及胡公不淫故周賜之姓使祀虞帝臣聞盛德必百世祀虞之世數未也繼守將在齊其兆旣存矣

昭公九年夏四月陳灾鄭裨竈曰五年陳將復封封五十二年而遂亡子產問其故對曰陳水屬也火水妃也而楚所相也今火出而火陳逐楚而建陳也妃以五成故曰五年歲五及鶉火而後陳卒亡楚克有之天之道也故曰五十二年

昭公十年正月有星出於婺女鄭裨竈言於子產曰

七月戊子晉君將死今茲歲在顓頊之虛姜氏任氏

實守其地居其維首而有妖星焉告邑姜也邑姜晉

之妣也天以七紀戊子逢公以登星斯於是乎出吾

是以譏之邑姜齊太公女晉康叔母古娶女為既嫁女織女為處女邑姜齊之既嫁女妖星在

知禰歸邑姜後七月戊子晉侯彪卒

昭公十七年冬有星孛於大辰西及漢裨竈言於子

產曰宋衛陳鄭將同日火若我用瓘筆玉瓚鄭必不

火子產弗與明年五月壬午宋衛陳鄭皆火竈曰不

用吾言鄭又將火鄭人請用之子產不可子太叔曰

寶以保民也若有火國幾亡可以救亡子何愛焉子

產曰天道遠人道邇非所及也竈焉知天道是亦多
言矣豈不或信遂不與亦不復火

公

年仲尼在陳有隼集於陳侯之庭而死枯

矢貫之石弩其長尺有咫陳惠公使人以隼如仲尼
之館問之仲尼曰隼之來也遠矣此肅慎氏之矢也
昔武王克商通道於九夷百蠻使各以其方賄來貢
使無忘職業於是肅慎氏貢楛矢石弩其長尺有咫
先王欲昭其令德之致遠也以示後人使永監焉故
銘其楛曰肅慎氏之貢矢以分大姬配虞胡公而封
諸陳古者分同姓以珍玉展親也分異姓以遠方之

職貢無忘服也故分陳以肅慎氏之貢君若使有司
求諸故府其可得也使求得之金櫝如之 右占候

哀公九年宋公伐鄭晉趙鞅卜救鄭遇水遄火占諸
史趙史墨史龜曰是謂沈陽可以興兵利以伐姜不
利於商伐齊則可敵宋不吉史墨曰盈水名也子水
位也各位敵不可干也炎帝爲火師姜姓其後也水
勝火伐姜則可史趙曰是謂如川之滿不可游也鄭
方有罪不可救也救鄭則不吉不知其他陽虎以周
易筮之遇泰  之需  曰宋方吉不可與也微
子啓帝乙之元子也宋鄭甥舅也祉祿也若帝乙之

元子歸妹而有吉祿我安得吉焉乃止
哀公十八年巴人伐楚圍鄆初右司馬公孫寧之卜
也觀瞻曰如志故命之及巴師至將卜帥王曰寧如
志何卜焉使帥師而行請承王曰寢尹工尹勤先君
者也公孫寧吳由於遠固敗巴師於鄆故封寧於柝
君子曰惠王知志夏書曰官占唯能蔽志昆命於元
龜其楚之謂乎志曰聖人不煩卜筮惠王其有焉
文公十三年邾文公卜遷於繹史曰利於民而不利
於君邾子曰苟利於民孤之利也天生民而樹之君
以利之也民既利矣孤必與焉左右曰命可長也君

何弗爲邾子曰命在養民死之短長時也民苟利矣
遷也吉莫如之遂遷於繹五月邾文公卒君子曰知
命

襄公九年成公之母穆姜薨於東宮初穆姜淫叔孫
僑如欲廢成公已而僑如出奔穆姜徙居東宮始往
而筮之遇艮之八三三三史曰是謂艮之隨三三三隨其
出也君必速出姜曰亡是於周易曰隨元亨利貞無
咎元體之長也亨嘉之會也利義之和也貞事之幹
也體仁足以長人嘉會足以合禮利物足以和義貞
固足以幹事然固不可誣也是以雖隨無咎今我婦

左氏文選卷三
三
人而與於亂固在下位而有不仁不可謂元不靖國
家不可謂亨作而害身不可謂利棄位而效不可謂
貞有四德者隨而無咎我皆無之豈隨也哉我則取
惡能無咎乎必死於此弗得出矣

僖公二十四年秦伯召晉公子重耳於楚公子親筮
之曰尚有晉國得貞屯  悔豫  皆八也筮史

占之皆曰不吉閉而不通爻無爲也司空季子曰吉
是在易皆利建侯不有晉國以輔王室安能建侯我
命筮曰尚有晉國筮告我曰利建侯得國之務也吉
孰大焉震車也坎水也坤土也屯厚也豫樂也車班

外內順以訓之泉原以資之土厚而樂其實不有晉
國何以當之震雷也車也坎勞也水也衆也主雷與
車而尚水與衆車有震武也衆而順文也文武其厚
之至也故曰屯其繇曰元亨利貞勿用有攸往利建
侯主震雷長也故曰元衆而順嘉也故曰亨內有震
雷故利貞車上水下必伯小事不濟壅也故曰勿用
有攸往一夫之行也衆順而有武威故曰利建侯坤
母也震長男也母老子彊故曰豫其繇曰利建侯行
師居樂出威之謂也是二者得國之卦也惠公卒秦
伯納公子及河董因迎公公問焉曰吾其濟乎對曰

左氏春秋卷三十三
二十三
歲在大梁將集天行元年始受實沈之星也實沈之
虛晉人是居所以興也今君當之無不濟矣君之行
也歲在大火大火闕伯之星也是謂大辰辰以成善
后稷是相唐叔以封晉史記曰嗣續其祖如穀之滋
必有晉國臣筮之得泰之八曰是謂天地配亨小往
大來今及之矣何不濟之有且以辰出而以參入皆
晉祥也而天之大紀也濟且秉成必霸諸侯子孫賴
之君無懼矣公入即位於武宮

昭公七年衛襄公夫人姜氏無子嬖人媯始生孟縶
孔成子慶康叔謂已立元余使羈之孫圉與史苟相

之史朝亦夢康叔謂已余將命而子苟與孔烝鉏之
魯孫圉相元史朝見成子告之夢夢協後嫺始生子
名之曰元孟繫之足不良弱行孔成子以周易筮之
曰元尚亨衛國主其社稷遇屯_{二二三}又曰余尚立繫
尚克嘉之遇屯之比_{二二三}以示史朝史朝曰元亨又
何疑焉成子曰非長之謂乎對曰康叔名之可謂長
矣孟非人也將不列於宗不可謂長且其繇曰利建
侯嗣吉何建建非嗣也二卦皆云子其建之康叔命
之二卦告之筮襲於夢武王所用也弗從何爲弱足
者居侯主社稷臨祭祀奉民人事鬼神從會朝又焉

得君各以所利不亦可乎故孔成子立靈公

右卜

公

年號公夢在廟有神人面白毛虎爪執鉞

立於西阿公惧而走神曰無走帝命曰使晉襲於爾
門公拜稽首覺召史噐占之對曰如君之言則辱收
也天之刑神也天事官成公使囚之且使國人賀夢
舟之僑告其諸族曰衆謂號亡不久吾乃今知之君
不度而賀大國之襲於已何瘳吾聞之曰大國道小
國襲焉曰服小國敖大國襲焉曰誅民疾君之侈也
是以遂於逆命今嘉其夢侈必展是天奪之鑿而益
其疾民疾其態天又誑之大國來誅出令而逆宗國

既卑諸侯遠已內外無親其誰云救之吾不忍俟也將行以其族適晉六年虢乃亡

昭公七年鄭子產聘於晉晉侯有疾韓起逆客私焉曰寡君寢疾於今三月矣並走群望有加而無瘳今夢黃熊入於寢門其何厲鬼也對曰以君之明子爲大政其何厲之有昔堯殛鯀於羽山其神化爲黃熊以入於羽淵實爲夏郊三代祀之晉爲盟主其或者未之祀也乎韓子祀夏郊晉侯有間賜子產莒之二方鼎

昭公二十五年宋元公將如晉夢大子欒即位於廟

已與平公服而相之旦召六卿公曰寡人不佞不能
事父兄以爲二三子憂寡人之罪也若以群子之靈
獲保首領以沒唯是楸柎所以藉幹者請無及先君
仲幾對曰君若以社稷之故私降昵宴群臣弗敢知
若夫宋國之法死生之度先君有命矣群臣以死守
之弗敢失隊臣之失職常刑不赦臣不忍其死君命
祇辱宋公遂行卒於曲棘

哀公二十六年宋景公無子取公孫周之子得與啓
畜於公宮未有立焉公遊於空澤卒於連中大尹奉
公自空桐入如沃宮立啓三日而後國人知之得夢

啓北首而寢於廬門之外已爲鳥而集於其上味加
於南門尾加於桐門曰余夢美必立皇非我使狗於
國曰大尹惑蠱其君以陵霄公室與我者救君者也
衆曰與之大尹狗曰戴氏皇氏將不利公室與我者
無憂不富衆曰無別戴氏皇氏欲伐公樂得曰不可
彼以陵公有罪我伐公則甚焉使國人施於大尹大
尹奉啓以奔楚乃立得

宣公三年鄭文公有賤妾曰燕姑夢天使與已蘭曰
余爲伯儵余而祖也以是爲而子以蘭有國香人服
媚之如是旣而文公見之與之蘭而御之辭曰妾不

才幸而有子將不信敢徵蘭乎公曰諾生穆公名之
曰蘭穆公有疾曰蘭死吾其死乎吾所以生也刈蘭
而卒 右夢

文公元年春王使內史叔服來會葬公孫敖聞其能
相人也見其子二焉叔服曰穀也食子難也收子穀
也豐下必有後於魯國

定公十五年春邾隱公來朝子貢觀焉邾子執王高
其容仰公受玉卑其容俯子貢曰以禮觀之二君者
皆有死亡焉夫禮死生存亡之體也將左右周旋進
退俯仰於是乎取之朝祀喪戎於是乎觀之今正月

相朝而皆不度心已忘矣嘉事不體何以能久高仰
驕也卑俯替也驕近亂替近疾君爲主其先亡乎

昭公十一年單子會韓宣子於戚視下言徐叔尚曰
單子其將死乎朝有著定會有表衣有禮帶有結會
朝之言必聞於表著之位所以昭事序也視不過結
禮之中所以道容貌也言以命之容貌以明之失則
有闕今單子爲王官伯而命事於會視不登帶言不
過步貌不道容而言不昭矣不道不共不昭不從無
守氣矣 右相

成公十年晉景公夢大厲被髮及地搏膺而踊曰殺

余孫不義余得請於帝矣壞大門及寢門而入公懼
入於室又壞戶公覺召桑田巫巫言如夢公曰何如
曰不食新矣公疾病求醫於秦秦伯使醫緩爲之未
至公夢疾爲二豎子曰彼良醫也懼傷我焉逃之其
一曰君育之上膏之下若我何醫至曰疾不可爲也
在育之上膏之下攻之不可達之不及藥不至焉不
可爲也公曰良醫也厚爲之禮而歸之六月丙午晉
侯欲麥使甸人獻麥饋人爲之召桑田巫示而殺之
將食張如廁陷而卒小臣有晨夢負公以登天及日
中負晉侯出諸廁遂以爲殉

昭公元年晉平公求醫於秦秦伯使醫和視之曰疾不可爲也是謂近女室疾如蠱非鬼非食惑以喪志良臣將死天命不祐公曰女不可近乎對曰節之先王之樂所以節百事也故有五節遲速本末以相及中聲以降五降之後不容彈矣於是有煩手淫聲悖堙心耳乃忘平和君子弗聽也物亦如之至於煩乃舍也已無以生疾君子之近琴瑟以儀節也非以悖心也天有六氣降生五味發爲五色徵爲五聲淫生六疾六氣曰陰陽風雨晦明也分爲四時序爲五節過則爲災陰淫寒疾陽淫熱疾風淫末疾雨淫腹疾

晦淫惑疾明淫心疾女陽物而晦時淫則生內熱惑
蠱之疾今君不節不時能無及此乎出告趙孟趙孟
曰誰當良臣對曰主是謂矣主相晉國於今八年晉
國無亂諸侯無闕可謂良矣和聞之國之大臣榮其
寵祿任其大節有留禍興而無改焉必受其咎今君
至於淫以生疾將不能圖恤社稷禍孰大焉主不能
禦吾是以云也趙孟曰何謂蠱對曰淫溺惑亂之所
生也於文皿蟲爲蠱穀之飛亦爲蠱在周易女惑男
風落山謂之蠱 **三三** 皆同物也趙孟曰良醫也厚其
禮而歸之是歲趙文子卒諸侯叛晉十年平公薨

右


右
璧

浙江圖書館

唐荆川先生編纂左氏始末卷之十二

浙江圖書館

八〇



浙江圖書館

浙江圖書館善本

甲 登記號：001317

一九 年 月 日

浙江圖書館

colorchecker CLASSIC



浙江圖書館

xrite



colorchecker CLASSIC



x-rite

